

公健益加甚致以終厥事次年冬臘月落成
使吳生頤來徵文記焉予惟民生而蒙蒙貴
養惟養本乃端比長而學學貴行惟行道乃
成是以小學之法務養以正使由之而後使
知之大學之法務要其成使知之而後使行
之弗養而使之知是無玉而琢也弗知而使
之行是瞽而索塗也故養而後知知而後行
教學之序也詩曰天生蒸民有物有則民之
秉彝好是懿德夫則也者理也窮究其理物

格之謂也格之者其爲修身而盡倫乎耳目
聰明之類所以修身也父慈子孝之類所以
盡倫也得其本萬物備擴而充之盈天地凡
夫理之幽明巨細遠近淺深無弗貫於一者
學校之設聯以師儒施以經史舍此亦奚所
事哉然世之卑陋者惟知記誦剽掠以業舉
而其高虛者則又竊取圓覺之說以亂真二
者之弊不同其悖先王教學之道一也予朱
子嘗曰學始知惟格物足以致之知之至則

意誠心正而大學之序推而達之無難者及其作瓊州記惟引蒸民之詩道以身心之所固有然則其所謂格物者豈求諸外而遂遺其本哉世發明朱學宜無若泉之蔡氏而張陳二公皆以程學出于其鄉相繼振起廉至賓興之期必有超瓊州才雋而上追鄒魯者矣然則圖廻化理用對聖天子之休命其在茲哉庸書以俟

廉州學田記

陳

逅

明進士御史
謫合浦簿

廉郡學故無田嘉靖乙酉秋郡有司創簿海
新田若干畝奉石江歐陽公文檄也先是公
督學廣東始至湧穢剔蠱張我文化凡二氏
廢業憚人寅緣互市者下令所司日月爲期
盡歸之官或量給學宮勸士于時廉俗以珠
故祈望爲崇些窳偷生之力以媚神二氏之
業旣卒無可考然而海濱斥鹵之地窮民勤
力其中僅成菑餘田在法當收稅而民囂然
稱不便者終委爲曠土于是郡守韓侯鸞二

守章侯諱節推趙侯琨博謀于野致議于公
體國之經徇民之便卒歸之學歲徵其租穀
畝二十升以濟士之好學而貧者公又曰是
又不可不著之記述以垂永久乃屬迺惟夫
二氏之徒禍天下由程朱以後幾乎莫知其
非矣公于是乃獨攘袂正已出力奮義平丘
隴而闢荆榛其有功斯文甚偉然而窮天僻
郡民不聊生乃雖欲從事於彼而不可得此
又憂時所宜痛切而傷心者也聖人有言旣

富方穀夫民朝夕勤手足贍口腹之不暇而
庶幾其愛身顧義以從教不亦悖乎是故公
所謂盡力斯文者制不及備而惠獨有餘也
吾又觀夫天下之士上焉者無所創焉而興
矣次焉者創而後興者也下焉者創之弗從
矣廉之士其無所創而興乎蓋或有之豈其
創之弗從乎非吾所望焉者也其力在上進
弗囿乎俗者其自是有所興矣夫興非勇於
記誦術辭章圖富貴而已也動稱聖賢所以

崇志躬修仁義所以尚行博通古今所以明
理未達也不以饑寒困踣亂其心既達也不
以聲色臭味易其守履正而善道守古訓以
終身斯學之善者也而或靜言庸違表裏衝
決孜孜外務惟俗之徇是斯文之蠹爾也已
迨既承公命且欲進廉士於道故於末也不
能無言

廉郡三社學記

昔者三代之隆蓋皆有少學太學之設而所

謂少學者卽今府州縣學以爲太學斂才之地而又黨有庠術有序以斂才于少學其地愈邇則其教愈密也故當是時鄉無不學之家家無不學之人相觀養正絕去浮習彙之則多碩才用之則皆成效彼固導之者有其漸矣嗟夫今世社學之名豈非三代序庠遺意哉顧自正統創立迄今竟無有大行者此非獨有司過也亦其爲父兄者無督率之嚴爲弟子者無觀摩之素而其師之教亦苟且

怠惰規規束脩之餽無復忠勤懇惻之實其俗積靡使然也夫今府州縣學旣不能盡其子弟而收之勢必資于社而社之學又輒廢弛若是則何望多士彬彬以比隆乎三代哉予自嘉靖己亥授教于廉蓋傷廉之學不振實自社學始以告有司有司不遂舉也今予旣身且舉之矣然而其教猶不行也予甚惑焉倘所謂氣化有通塞人才有盛衰其尚有待耶不然則誠其父兄子弟與其師教之過

也不然則是予之罪也予不敢咎乎廉人而姑爲記以申之而且告于後之守者知社學之必在所興也社學之建凡三東曰東泮西曰西江北曰北園成於嘉靖辛亥之春記於乙卯夏四月之望云

尚志書院記

陳儲秀

明侍御

廉瀕海爲郡士氣少振故學宮地因泥形家之說更於元妙觀而以其地易之相傳爲元時事也循襲至今未之有改者嘉靖甲辰胡